

Decision awe riba ruta nobo di Carnaval

No ta bay tin kavel riba ruta di Carnaval 2012

ORANJESTAD – Mientras cu un decision ta tuma caba, un otro mester cai posiblemente awe ainda segun presidente di SAC Tecla Kelly a bisa BONDIA ARUBA ayera. E decision cu no ta pone kavel pa ruta di carnaval 2012 na Playa ya ta un hecho segun Kelly, y awe e decision por cai si e ruta 'nobo' presenta lo keda aproba durante un reunion awe mainta na DOW. Kelly a musta cu e ruta cu ta riba mesa awor pa paradanan den Oranjestad (saliendo for di Compleho Frans Figaroa, sigui bai abou direccion rotonde Ponton, drenta Sta Helenastraat y termina na rotonde na Wendy's) lo mester haya aprobacion for di awe posiblemente caba. Si esei no tuma lugar, e decision final definitivo por cai otro luna. Pero no tin motibo pa haci esaki

mirando cu tur cos ta den direccion di e ruta nobo aki cu ta practicamente aproba.

E ruta aki ta un di e hopi rutan cu a wordo sugeri pero cu finalmente a bira esun den 'contienda' pa aprobacion durante un reunion awe mainta na oficina di DOW. Durante e reunion aki, SAC, DOW, polis, gruponan di carnaval y otro instancianan pertinente na carnaval, lo tin cu sinta cu otro pa wak si tur cos ta na lugar y cu si tin suficiente argumento pa por aproba e ruta nobo for di awe caba.

Un decision mientrastanto cu ya ta tuma caba segun Kelly, ta cu sea cual sea e ruta nobo, cu esaki no ta conta mas cu kavel manera cu e ruta actual a conoce pa hopi aña. Motibonan tin varios pero e decision ta uno tuma y cu sol-

amente si gobierno cambia di opinion, cu esaki por revoca e decision tuma riba kavel. Kelly ta confirma na BONDIA ARUBA cu SAC mes ta uno cu no ta pro e asunto di kavel, ya cu den pasado esaki a conoce hopi problema caba durante e paradanan.

Ta conoci caba cu e motibo di cambio di ruta ta debi na plannan ambicioso di Gabinete Mike Eman pa structuralmente embeyece parti di LG Smith Boulevard, cu ta pone cu e parada no por pasa mas riba parti di e ruta aki otro aña. Entre otro mester pensa riba plantacion di palma di coco riba e caminda dilanti Bestuurskantoor, presencia di un Linear Park cu ta cubri gran parti di e ruta tambe y otro asuntonan structural cu ta stroba e parada di pasa riba e ruta otro aña. □